

საქართველოს პრეზიდენტსა

და

საჯარო სამართლის იურიდიულ პირს - საქართველოს თეატრის, მუსიკის,  
კინოსა და ქორეოგრაფიის სახელმწიფო მუზეუმს - ხელოვნების სასახლეს

შორის

ურთიერთთანამშრომლობის მემორანდუმი

28 მაისი, 2019 წელი

ქ. თბილისი

საქართველოს პრეზიდენტსა და

საჯარო სამართლის იურიდიულ პირს - საქართველოს თეატრის, მუსიკის, კინოსა და ქორეოგრაფიის სახელმწიფო მუზეუმს - ხელოვნების სასახლეს შორის

ურთიერთთანამშრომლობის შესახებ მემორანდუმი

28 მაისი, 2019წ.

ქ. თბილისი

**მხარეები:**

საქართველოს პრეზიდენტი (შემდეგში „პრეზიდენტი“) ქალბატონი სალომე ზურაბიშვილი და სსიპ საქართველოს თეატრის, მუსიკის, კინოსა და ქორეოგრაფიის სახელმწიფო მუზეუმი - ხელოვნების სასახლე (შემდეგში „მუზეუმი“), წარმოდგენილი მისი დირექტორის, პროფესორ გიორგი კალანდიას სახით;

ვიღებთ რა მხედველობაში ხელოვნების უდიდეს როლს ქვეყნის განვითარებაში, ქართული კულტურული ტრადიციების პოპულარიზაციისთვის ერთობლივი ინიციატივების განხორციელების მიზნით, პრეზიდენტი და მუზეუმი ვთანხმდებით ურთიერთთანამშრომლობის მემორანდუმის გაფორმებაზე.

**1. მემორანდუმის საგანი**

წინამდებარე მემორანდუმის საგანია ამ დოკუმენტით გათვალისწინებული მიზნებისთვის მხარეებს შორის ურთიერთგაგების, კეთილსინდისიერებისა და პატივისცემის პრინციპებზე დაფუძნებული თანამშრომლობა.

**2. მემორანდუმის მიზანი**

მემორანდუმის მიზანია მხარეთა საერთო ინტერესების სფეროში შემავალ აქტუალურ საკითხებზე თანამშრომლობა, პრეზიდენტის პატრონაჟით კულტურულ-საგანმანათლებლო პროექტების განხორციელების გზით.

**3. მემორანდუმის ამოცანები**

მემორანდუმის ამოცანებია:

3.1. პრეზიდენტის გადაწყვეტილების შემთხვევაში, მუზეუმის დარბაზებში მაღალი დონის სტუმრების მიღების გამართვა;

- 3.2. პრეზიდენტის გადაწყვეტილების შემთხვევაში, მუზეუმის დარბაზებში ქართველი ან/და უცხოელი სტუმრების დაჯილდოების ცერემონიალების მოწყობა;
- 3.3. პრეზიდენტის ინიციატივის შემთხვევაში, საპატიო სტუმრების მოწვევა მუზეუმში, მათთვის ჩვენი ქვეყნის კულტურული ცხოვრების გასაცნობად;
- 3.4. ორმხრივი ინიციატივის შემთხვევაში, მუზეუმის მიერ, საქართველოს კანონით დადგენილი წესით, მუზეუმში დაცული ხელოვნების ნიმუშების პრეზიდენტის სასახლეში დროებით განთავსება, მათი პოპულარიზაციის მიზნით;
- 3.5. ორმხრივი ინიციატივით თემატური გამოფენების მოწყობა პრეზიდენტის სასახლეში, მათი პოპულარიზაციისა და საპატიო სტუმრებისთვის გაცნობის მიზნით;
- 3.6. სხვა ღონისძიებების განხორციელება მემორანდუმის ფარგლებში, თანამშრომლობის მიზნების მისაღწევად.

#### **4. მხარეთა უფლება-მოვალეობანი**

- 4.1. მხარეები იღებენ ვალდებულებას მემორანდუმით გათვალისწინებული საქმიანობა წარმართონ ურთიერთშეთანხმებისა და კოორდინაციის პრინციპებზე დაყრდნობით;
- 4.2. მხარეები იღებენ ვალდებულებას, მემორანდუმის ფარგლებში საქმიანობის განხორციელებისას შეუთანხმონ ერთმანეთს ნებისმიერი პირობები, რომელიც შეიძლება შეეხოს მეორე მხარის კანონიერ უფლებებს და ინტერესებს.

#### **5. მემორანდუმის მოქმედების ვადა და შეწყვეტა**

- 5.1. წინამდებარე მემორანდუმი ძალაში შედის მხარეთა მიერ ხელმოწერის დღიდან და მოქმედებს განუსაზღვრელი ვადით;
- 5.2. მიზეზის დასახელების გარეშე წინამდებარე მემორანდუმის გაუქმება შესაძლებელია მეორე მხარისთვის 30 (ოცდაათი) კალენდარული დღით ადრე, წერილობითი შეტყობინების საფუძველზე;
- 5.3. კონკრეტული მიზეზის მითითებით მემორანდუმის გაუქმება შესაძლებელია მეორე მხარისთვის 14 (თოთხმეტი) კალენდარული დღით ადრე, წერილობითი შეტყობინების საფუძველზე;



**6. დამატებითი პირობები**


- 6.1. მემორანდუმის საფუძველზე მხარეებს შორის წარმოშობილი ურთიერთობა არ ნიშნავს რაიმე სახის ასოციაციის, კავშირის ან/და გაერთიანების შექმნას;
- 6.2. მესამე პირთან ურთიერთობისას მხარეს არა აქვს უფლება იმოქმედოს მეორე მხარის სახელით.

**7. კომუნიკაციის ფორმა, მემორანდუმის ეგზემპლარები**

- 7.1. მხარეებს შორის კომუნიკაცია ხორციელდება წერილობითი ფორმით (ფოსტით ან ელექტრონული ფოსტით);
- 7.2. მემორანდუმი შედგენილია ორ თანაბარ იურიდიული ძალის მქონე ეგზემპლარად და ინახება მხარეებთან.

**მხარეთა რეკვიზიტი და ხელმოწერა**

სალომე ზურაბიშვილი  
საქართველოს პრეზიდენტი



გიორგი კალანდია  
სსიპ - საქართველოს თეატრის,  
მუსიკის, კინოსა და ქორეოგრაფიის  
სახელმწიფო მუზეუმი - ხელოვნების  
სასახლის დირექტორი



ია კარგარეთელის ქ. #6  
თბილისი, საქართველო  
ტელ: +995 2953563  
ელ.ფოსტა: [Geoartpalace@gmail.com](mailto:Geoartpalace@gmail.com)

ათონელის ქ. #25